

RADUNANZA CUMÜNELA

109. Protocol dals 27-03-2024 - 20.15 h

Il president cumünel, sar Romeo Cusini, po salüder 49 personas cun dret da vuscher a la radunanza cumünela illa sela da gimnastica da la scoula primara. Specielmaing bivgnainta el las rapreschantantas ed ils rapreschantants da las medias. Impü bivgnainta il president a duonna Annina Schöpf, la giarsuna da l'administraziun cumünela. Ella piglia part a la radunanza cumünela scu giast. L'agir da tschantedas e radunanzas scu eir la tematica protocol sun part da sia scolaziun i'l giarsunedi commercial. Duonna cusgliera Alexandra Blumenthal es absainta e cun que s-chüседа.

Aunz scu cumanzer la radunanza onurescha il president cumünel al anteriur president cumünel Andrea Giacomo Gilli („Geben“) barmör. El prelegia üna poesia dad Artur Caflisch e dumanda la radunanza per ün mumaint da silenzi.

Il president cumünel constata cha l'invid culla glista da tractandas per la radunanza cumünela es gnieu tramiss tenor artichel 30 da la constituziun cumünela. Cunter la glista da tractandas nu do que üngünas objecziuns our dal ravuogl da la radunanza.

Scu scrutinaduors vegnan numnos e tschernieus per la vart vers il Piz Arpiglia sar Roman Grossrieder e sar Herbert Baschnonga per la vart vers il Piz Viroula e la maisa dal cussagl. Il president gratulescha per la tscherna onurifica.

638 01 Organिसaziun da vschinauncha
 01.C Radunanza cumünela
 01.D.01 Approvaziun protocol

1. Protocol da la radunanza cumünela dals 14 favrer 2024

Il protocol da la radunanza cumünela dals 14 favrer 2024 es sto publicho vi da la tevla naira e sülla pagina d'internet da la vschinauncha dals 15 favrer 2024 fin ils 18 marz 2024. Ils votants e las votantas haun temp 30 dis, düraunt il temp da publicaziun, per inoltrer eventuels recuors cunter il protocol. Siand cha que nu d'eira il cas vela il protocol automaticamaing scu approvo. Il president ingrazcha al chanzlist Patrick Steger per la cumpilaziun e la publicaziun.

- 639 19 Bains immobigliers cumünels
 19.B.02.01 Chesa da scoula
 19.C.05 Ulteriurs terrains cumünels

2. Finanziaziun progets piazza da scoula e tualettas publicas

Il president cumünel introdüja illa tractanda fand ün riassunt sur da l'istorgia dals progets tractandos. Ils duos progets sun oriund naschieus our dals programs d'acziun Zuoz 2020 e 2025 cul böt dad augmanter la valur dal minz da la vschinauncha. Imsüras d'eiran traunter oter augmanter la valur da la piazza da scoula e chatter üna soluziun per tualettas publicas i'l minz da la vschinauncha. In avuost 2022 ho la radunanza cumünela aderieu ad üna dumanda da credit per l'imbellimaint da la piazza da scoula sur CHF 490'000. Il cussagl cumünel ho sün la decisiun da l'avuost 2022 piglio a maun las lavuors da proget. Il prüm, la fin d'avuost 2022, culla progettaziun da l'imbellimaint da la piazza da scoula. La fin dal 2023 ho il cussagl cumünel decis da svilupper ün ulteriur proget per tualettas publicas i'l plaun suotterraun traunter la chesa cumünela e la sela da gimnastica. L'elavuraziun dals duos progets, piazza da scoula e tualettas publicas, ho musso cha tar la piazza da scoula fo que sen da saner ed adatter eir l'infrastructura suot terra. Cun que, ho decis il cussagl cumünel, in sias tschantedas, da perseguiter la realisaziun da la piazza da scoula insaunbel cullas tualettas publicas e la sanaziun da l'infrastructura suot terra illa piazza da scoula. Il cussagl cumünel ho decis d'utuon 2023 dad invier per parts dal proget üna submitsiun per calculer ils cuosts, que per avair üna pü granda sgürezza da cuosts. Il president cumünel muossa vi sül cumanzamaint dals impissamaints e preschainta quatter disegns da scolaras e scolaras da la scoula primara, chi d'eiran gnies dumandos da disegner lur giavüschs in connex cun üna nouva piazza da scoula. Üna da las dumandas principelas dal cussagl cumünel es steda quella, che cha la püvalur dals progets es. El spiega la püvalur scu lö d'inscunter per tuot las eteds, la püvalur dad ün'infrastructura per ün'utilisaziun flexibla per differents evenimaints e la püvalur per il minz da la vschinauncha. El spiega ils differents adövers da la piazza da scoula e da las tualettas publicas. La piazza da scoula, es sper üna piazza da scoula eir ün lö d'inscunter dadour il temp da scoula, per iffaunts e creschieus, per indigens e giasts. Las tualettas publicas laschan tiers ün adöver flexibel, saja que separo traunter public e scoula u eir cumbino düraunt evenimaints in sela da gimnastica u sün Plaz. Finelmaing spiega il president ils cuosts previs per ils duos progets tractandos. Per l'imbellimaint da la piazza da scoula (sainza lavuors suot terra) sun gnies previs cuosts dad arduond CHF 612'500. Per la tualetta publica sun gnies stimos cuosts da CHF 634'000 e per las lavuors suot terra sun gnies previs cuosts dad arduond CHF 411'100. Que do ün totel da cuosts dad arduond CHF 1'657'600. Zieva avair declaro tuot las parts dals progets evra il president cumünel la discussiun per la radunanza cumünela.

Üna votanta dumanda scha la spüerta da tualettas publicas dals restorants i'l minz da la vschinauncha resta eir culla realisaziun da tualettas publicas tar la piazza da scoula. Duonna cusgliera Ladina Tarnuzzer spiega cha las convegnoas existentas cullas dittas da gastronomia i'l minz, voul dir auncha las dittas Crusch Alva e Klarer, zieva cha'l restaurant Walter nu vain pü gestiuno, as po piglier a maun e discuter eir pel futur.

Zieva cha nu vain pü dumando il pled da la radunanza cuntinua il president cumünel culla votaziun sur da la dumanda da credit sur CHF 1.7 milliuns per la finanziaziun cumplessiva dals progets piazza da scoula e tualettas publicas. La radunanza vuscha cun 48 vuschs da schi, que cun ün'absteniun. Il president cumünel s'ingrazcha per la fiduzcha.

640 10 Silvicultura
10.O Repars cunter lavinias

3. Dumanda da credit – rimplazzamaint repars da lavinias Albanas, 3. Etappa

Il proget da rimplazzer ils repars da lavinias sün Albanas ho cumanzo culla 1. etappa dal 2017 ed ho continuo dal 2022 culla 2. etappa chi vain a glivrer düraunt il 2024. Uossa es sün maisa la 3. ed ultima etappa chi vess da dürer dal 2024 fin 2025. Respunsabel per la realisaziun es l'uffizi chantunel da god e prieveles da natüra. Il proget vain eir darcho subvenziuno dal chantun cun 78%. Per la 3. etappa sun previs cuosts da CHF 1.5 milliuns, voul dir cuosts restants per la vschinauncha da Zuoz da CHF 330'000. A maun dad üna carta spiega il president cumünel las differentas etappas dal proget. Agiunt evra el la discussiun per la radunanza.

Ün votant voul savair, scha la fundamainta dal proget previs es missa our per installer panels da solar. Il president declera our da la perspectiva da sieu mister scu indschegner, cha que nu dependa da la fundamainta, dimperse dal squitsch da la naiv süls panels. Ün stüdi in connex es auncha aviert. Ün votant po agiundscher cha quista dumanda es già gnida sclarida dal institut da l'institut per prescrutaziun da naiv e lavinias da Tavo (SLF). A maun da prouvas tar ün proget a St. Anthönien ho l'institut scusglio e scumando da realiser panels da solar sün repars da lavinias. Que precis our dals motivs cha'l president cumünel ho spiego. Sar cusglier Flurin Wieser remarcha impü cha'l stüdi curraint ho eir examinö la situaziun dals subsidis federels. Quists as rendessas a partir da 10 kW, pussibels sün Albanas sun ca. 1 fin 1.5 kW.

Zieva cha nu vain pü dumando il pled da la radunanza cumünela cuntinua il president culla votaziun sur da la dumanda da credit per CHF 1.5 milliuns per la realisaziun da la 3. Etappa dal rimplazzamaint dals repars da lavinias sün Albanas. La radunanza cumünela aderescha unanimamaing a la dumanda da credit e deliberescha CHF 1.5 milliuns.

641 01 Organisaziun da vschinauncha
01.C Radunanza cumünela
01.C.05 Infurmaziuns

4. Orientaziuns

Collavuraziun in connex cun la gestiun forestela e la gruppa per lavuors cumünelas da las vschinaunchas da S-chanf e Zuoz: La suprastanza da S-chanf ho decis la fin da l'an 2023 da der la desditta alla cunvegna da la collavuraziun in connex cun la gestiun forestela e la gruppa per lavuors cumünelas da las vschinaunchas da S-chanf e Zuoz. Quista cunvegna vess stuvieu gnir prolungeda zieva ün temp da prouva definieu a la fin da l'an 2023. Il cussagl cumünel da Zuoz es sto perinplet da surpiglier las lavuors existentas per ün temp transitoric dals 1. schner 2024 fin ils 30 avrigl 2024. Üngünas consequenzas ho la decisiun da la suprastanza da S-chanf per ils collavuratuors dal servezzan tecnic, chi sun e restan impiegos da la vschinauncha da Zuoz. Il president cumünel s'ingrazcha in quist'ocasiun per lur grandiusa lavur a favur da la vschinauncha da Zuoz.

